

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", broj 7/97 i 3/99 i "Službene novine Tuzlanskog kantona", broj 13/99, 10/00, 14/02, 6/04 i 10/04), na prijedlog Vlade Tuzlanskog kantona. Skupština Tuzlanskog kantona, na sjednici održanoj dana _____ 2021 godine, donosi

ZAKON
O IZMJENAMA I DOPUNAMA ZAKONA O INSPEKCIJAMA
TUZLANSKOG KANTONA

Član 1.

U Zakonu o inspekcijama Tuzlanskog kantona ("Službene novine Tuzlanskog kantona", broj: 12/20), u članu 12. u stavu (1) riječi: Etičkog kodeksa za državne službenike u Federaciji Bosne i Hercegovine ("Službene novine Federacije Bosne i Hercegovine", broj: 27/14), zamjenjuju se riječima "Etičkim kodeksom koji je važeći za državne službenike u Federaciji Bosne i Hercegovine"

Član 2.

U članu 24 stav (2) briše se.

U stavu (3) riječi "iz stava (2) ovog člana" brišu se.

U stavu (4) iza riječi "programa", dodaje se riječ "rada" a riječi: "i planova" brišu se.

Član 3.

U članu 33., tačka a) mijenja se i glasi: "a) glavni kantonalni inspektor za poljoprivredu, vode i šumarstvo."

U tački f) na kraju teksta briše se slovo "i" i stavlja zarez.

U tački g), na kraju teksta briše se tačka i dodaje slovo "i".

Iza tačke g) dodaje se nova tačka h) koja glasi: "h) glavni kantonalni inspektor za veterinarstvo".

Član 4.

U članu 37 tekst "20%" zamjenjuje se tekstem "od 20 do 30%"

Član 5.

Član 45. mijenja se i glasi:

"Član 45.
(Opis poslova)

Kantonalna urbanističko-građevinska inspekcija vrši inspekcijski nadzor nad provođenjem zakona i drugih propisa koji se odnose na:

- a) izradu dokumenata prostornog uređenja koje donosi Skupština Kantona i dokumenata za koje Ministarstvo prostornog uređenja i zaštite okolice Tuzlanskog kantona (u daljem tekstu: Ministarstvo prostornog uređenja), daje saglasnost prije njihovog usvajanja,
- b) provedbu Prostornog plana Kantona i Prostornog plana područja posebnog obilježja od značaja za Kanton, urbanističkog i detaljnog plana uređenja za područja od značaja za Kanton.
- c) gradnju za koju Ministarstvo prostornog uređenja na temelju prethodno pribavljenog mišljenja nadležne općinske službe utvrđuje preduvjete za odobravanje planirane promjene u prostoru, stručnom ocjenom na temelju koje se donose urbanističko-tehnički uvjeti za građevine za koje je nadležno Ministarstvo prostornog uređenja i usaglašenošću lokacijske informacije odnosno urbanističke saglasnosti sa planskim dokumentima i stručnom ocjenom za građevine za koje Ministarstvo prostornog uređenja izdaje lokacijsku informaciju, odnosno urbanističku saglasnost,
- d) izgradnju građevina i zahvata koji će se odvijati na područjima dvije ili više općina i gradova,
- e) izgradnju građevina i zahvata od značaja za Kanton.
- f) izgradnju proizvodnih objekata preko 4000 m²,
- g) građevina u cestovnom i zaštitnom pojasu magistralnih i regionalnih cesta izvan urbanih područja koje su definisane zakonom, te rekonstrukciju regionalnih i magistralnih cesta van urbanog područja,
- h) izgradnju pilana, brenti, asfaltnih baza, postrojenja za proizvodnju električne energije iz hidroelektrana snage do 1 MW, istraživanje i eksploataciju mineralnih sirovina i podzemnih voda,
- i) izgradnju građevina i zahvata koje u cjelosti finansira Vlada Kantona.
- j) izgradnju građevina i izvođenje zahvata u Zaštićenom pejzažu „Konjuh“, izuzev individualnih stambeno-poslovnih i stambenih objekata, vikend objekata i pomoćnih građevina namijenjenih redovnoj upotrebi,
- k) primjenu urbanističko-tehničkih građevinskih normativa i propisa i kvalitetom ugrađenih građevinskih materijala, poluproizvoda i proizvoda u građevinama i zahvatima u prostoru iz svoje nadležnosti,
- l) deponije za odlaganje čvrstog otpada od kantonalnog značaja,
- m) obavljanje i drugih inspekcijskih poslova u skladu sa ovlaštenjima datim u pojedinim zakonima i drugim propisima, a po nalogu glavnog kantonalnog inspektora i direktora Kantonalne uprave.

Član 6.

Član 58. mijenja se i glasi:

"Član 58. (Opis poslova)

Kantonalna sanitarna inspekcija vrši inspekcijski nadzor nad provođenjem zakona i drugih propisa koji se odnose na:

- a) primjenu zakona i drugih propisa donesenih na osnovu zakona, kojima se uređuje sanitarna oblast u skladu sa ovlaštenjima i nadležnostima propisanim zakonom,
- b) kontrolu provedbe općih i posebnih mjera za sprječavanje i suzbijanje zaraznih bolesti,
- c) kontrolu sanitarno-tehničkih i higijenskih uslova u odgojno-obrazovnim ustanovama, ustanovama u oblasti zdravstva, dječije i socijalne zaštite, sredstvima javnog prijevoza i drugim javnim mjestima, od značaja za obezbjeđenje sanitarne, higijenske i protivepidemijske zaštite,
- d) kontrolu zdravstvenog stanja zaposlenih u djelatnostima i na poslovima koji su pod sanitarnom inspekcijskom kontrolom,
- e) nadzor nad obavljanjem obavezne dezinfekcije, dezinskcije i deratizacije,
- f) obavljanje i drugih inspekcijskih poslova u skladu sa ovlaštenjima datim u pojedinim zakonima i drugim propisima, a po nalogu glavnog kantonalnog inspektora i direktora Kantonalne uprave."

Član 7.

Član 59. mijenja se i glasi:

"Član 59. (Opis poslova)

Kantonalna zdravstvena inspekcija vrši inspekcijski nadzor nad provođenjem zakona i drugih propisa koji se odnose na:

- a) nadzor nad orgamzovanjem i obavljanjem zdravstvene djelatnosti u javnim i privatnim zdravstvenim ustanovama i privatnoj praksi u zdravstvu,
- b) nadzor nad radom zdravstvenih radnika u obavljanju zdravstvene djelatnosti.
- c) kontrolu vođenja medicinske dokumentacije i evidencija u oblasti zdravstva.
- d) sadržaj i kvalitet pruženih zdravstvenih usluga.
- e) kontrolu primjene Zakona o pravima, obavezama i odgovornostima pacijenata,
- f) nadzor nad provođenjem javnih programa i mjera zdravstvene zaštite,
- g) nadzor nad upravljanjem medicinskih otpadom,
- h) obavljanje i drugih inspekcijskih poslova u skladu sa ovlaštenjima datim u pojedinim zakonima i drugim propisima, a po nalogu glavnog kantonalnog inspektora i direktora Kantonalne uprave."

Član 8.

U članu 63. stav (4), riječi "kantonalnih propisa kojima je prenesena nadležnost na opštinu i grad", zamjenjuju se riječima "kantonalnih i drugih propisa kojima je određena nadležnost opštinskih i gradskih inspekcija",

Član 9.

Iza člana 95. dodaju se novi članovi „95a . „95b . „95c. i „95d. koji glase

"Član 95a. (Obaveza kantonalnog inspektora za izuzeće)

Kantonalni inspektor izuzet ce se od rada u predmetu:

- a) ako je u predmetu u kome se vodi inspekcijski postupak: stranka, suovlaštenik, odnosno suobveznik, svjedok, vještak, punomoćnik ili zakonski zastupnik stranke u postupku,
- b) ako je sa strankom u postupku, zastupnikom ili punomoćnikom stranke srodnik po krvi u pravoj liniji, a u pobočnoj liniji do četvrtog stupnja zaključno, bračni drug ili srodnik po tazbini do drugog stupnja zaključno, pa i onda kad je brak prestao,
- c) ako je sa strankom u postupku, zastupnikom ili punomoćnikom stranke u odnosu staraoca, usvojioca, usvojenika ili hranioca."

"Član 95b. (Postupanje kantonalnog inspektora po saznanju za razloge za njegovo izuzeće)

(1) Kantonalni inspektor, čim sazna da postoji koji od razloga za izuzeće iz člana 95a. ovog zakona, dužan je da prekine svaki daljnji rad na predmetu i da o tome u pisanoj formi obavijesti direktora Kantonalne uprave.

(2) Ako kantonalni inspektor smatra da postoje druge okolnosti koje opravdavaju njegovo izuzeće, obavijestit će o tome direktora Kantonalne uprave ne prekidajući rad."

**"Član 95c.
(Zahtjev stranke za izuzeće kantonalnog inspektora)**

(1) Stranka u inspekcijskom postupku može zahtijevati izuzeće kantonalnog inspektora iz razloga navedenih u članu 95a. ovog zakona, a i kad postoje druge okolnosti koje dovode u sumnju njegovu nepristrasnost.

(2) U zahtjevu za izuzeće, stranka mora navesti okolnosti i činjenice zbog kojih smatra da postoji neki od razloga za izuzeće.

(3) Kantonalni inspektor za kojeg je stranka u postupku zahtijevala izuzeće iz nekog od razloga navedenog u članu 95a. ovog zakona, ne može, sve do donošenja zaključka o ovom zahtjevu, obavljati nikakve radnje u inspekcijskom postupku, osim onih koje ne trpe odgađanje

(4) Zahtjev za izuzeće kantonalnog inspektora, stranka podnosi u pisanoj formi direktoru Kantonalne uprave, putem pošte ili neposrednom predajom na centralnu pisarnicu Ureda za zajedničke poslove kantonalnih organa Tuzlanskog kantona."

"Član 95d.

(1) O izuzeću kantonalnog inspektora odlučuje direktor Kantonalne uprave, u roku od 15 dana od dana prijema zahtjeva

(2) O izuzeću kantonalnog inspektora odlučuje se zaključkom.

(3) U zaključku o izuzeću kantonalnog inspektora, odredit će se kantonalni inspektor koji će postupati u predmetu u kome je izuzeće određeno.

(4) Protiv zaključka kojim se odlučuje o izuzeću kantonalnog inspektora, nije dopuštena žalba."

Član 10.

U članu 106. stav (3) iza riječi "podatke" dodaju se riječi "i druge dokaze"

Član 11.

U članu 110. stav (2) iza riječi "subjekt nadzora" dodaju se riječi "i svako drugo lice", a riječi "je dužan" zamjenjuju se riječima "su dužni"

Član 12.

U članu 112 stav (2) riječ "upravne" se briše

Član 13.

U članu 165. iza stava (2) dodaje se novi stav (3) koji glasi: "(3) Novčanom kaznom iz člana 164. stav (3) ovog zakonakazniče se za prekršaj svako lice koje kantonalnom inspektor ne da tražene podatke i druge dokaze za pravilno utvrđivanje činjeničnog stanja (član 106. stav (3)).

Dosadašnji stav (3) postaje stav (4).

Član 14.

Ovaj Zakon stupa na snagu osmog dana od dana objavljivanja u "Službenim novinama Tuzlanskog kantona"

**Bosna i Hercegovina
Federacija Bosne i Hercegovine
TUZLANSKI KANTON
SKUPŠTINA**

**Predsjednik
Skupštine Tuzlanskog kantona
Slađan Ilić**

**Broj:
Tuzla,**

O B R A Z L O Ž E N J E

uz Zakon o izmjenama i dopunama Zakona o inspekcijama Tuzlanskog kantona

I - USTAVNI OSNOV ZA DONOŠENJE ZAKONA

Ustavni osnov za donošenje Zakona o izmjenama i dopunama Zakona o inspekcijama Tuzlanskog kantona sadržan je u članu 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", br. 7/97 i 3/99 i "Službene novine Tuzlanskog kantona", br. 13/99, 10/00, 14/02, 6/04 i 10/04), kojim je utvrđeno da Skupština Tuzlanskog kantona donosi zakone i ostale propise neophodne za izvršavanje nadležnosti Kantona.

II - RAZLOZI ZA DONOŠENJE ZAKONA

Zakon o inspekcijama Tuzlanskog kantona ("Službene novine Tuzlanskog kantona", broj 12/20), je u primjeni od 15.08.2020. godine i u tom periodu se ukazala potreba za izmjenama istog iz više razloga.

Zbog specifičnosti poslova veterinarske inspekcije, neophodno je da se u Kantonalnoj upravi za inspeksijske poslove Tuzlanskog kantona, formira poseban inspektorat za veterinarstvo kojim će rukovoditi glavni inspektor za veterinarstvo, a koje radno mjesto nije sadržano u članu 33. važećeg Zakona o inspekcijama Tuzlanskog kantona.

Osim toga, u navedenom periodu ukazala se potreba za izmjenama Zakona o inspekcijama Tuzlanskog kantona i u drugom pogledu, što će, sasvim je izvjesno, olakšati rad kantonalnih inspektora na terenu, precizirati pojedine odredbe Zakona i doprinijeti popunjavanju pravnih praznina.

III - OBRAZLOŽENJE POJEDINIH ZAKONSKIH RJEŠENJA

POGLAVLJE I- OSNOVNE ODREDBE (Čl.1.-15.)

1) U poglavlju I u okviru Osnovnih odredbi Zakona o inspekcijama Tuzlanskog kantona, u članu 12. propisano je da je u svome radu kantonalni inspektor dužan da se rukovodi načelima Etičkog kodeksa za državne službenike u Federaciji Bosne i Hercegovine („Službene novine Federacije Bosne i Hercegovine", broj 27/14). Navedeni Etički kodeks je prestao važiti sa danom 17.09.2020. godine, kada je stupio na snagu novi Etički kodeks za državne službenike u Federaciji Bosne i Hercegovine („Službene novine Federacije Bosne i Hercegovine", broj: 63/20), zbog čega je u tom smislu bilo potrebno navedeni član 12. uskladiti. Međutim, kako bi se izbjeglo u budućnosti da se zbog izmjene navedenog propisa pokreće inicijativa za izmjene Zakona o inspekcijama Tuzlanskog kantona, u članu 1. Nacrta Zakona je predložena izmjena člana 12 na način da se primijeni otvoreno pozivanje na drugi propis, što je pravno dopustivo i u skladu sa članom 40. Pravila i postupaka za izradu zakona i drugih propisa Federacije Bosne i Hercegovine („Službene novine Federacije Bosne i Hercegovine", broj: 71/14), kojeg su, u skladu sa članom 28. stav (2) Poslovnika o radu Vlade Tuzlanskog kantona, dužni primjenjivati kantonalni organi.

2) U poglavlju III. - Organizacija Kantonalne uprave u Zakonu o inspekcijama Tuzlanskog kantona, u članu 24. regulisano je planiranje i izvještavanje o inspeksijskom nadzoru, koje je usklađeno sa odredbama Zakona o organizaciji organa uprave u Federaciji Bosne i Hercegovine ("Službene novine Federacije Bosne i Hercegovine", broj: 35/05) i odredba je istovjetna kao u federalnom i Zakonu o inspekcijama drugih kantona.

3) U poglavlju IV. - Inspeksijski poslovi, inspektori i njihov status u Zakonu o inspekcijama Tuzlanskog kantona, u članu 33. neophodno je uspostaviti novo radno mjesto Glavnog kantonalnog inspektora za veterinarstvo koji će rukovoditi Inspektoratom za veterinarstvo, s obzirom na specifičnosti poslova veterinarske inspekcije i zakonskih obaveza glavnog inspektora za tu upravnu oblast, a što iziskuje da glavni inspektor posjeduje veterinarsku struku, što sada nije slučaj. Zbog navedenog je u članu 3. Nacrta Zakona predložena navedena izmjena Zakona, uz napomenu da su poslovi veterinarske inspekcije trenutno u sastavu Inspektorata za poljoprivredu, vode, šumarstvo i veterinarstvo kojim rukovodi Glavni kantonalni inspektor za poljoprivredu, vode, šumarstvo i veterinarstvo.

Takođe, u članu 4. Nacrta Zakona je predloženo povećanje posebnog dodatka na platu direktora Kantonalne uprave, glavnog kantonalnog inspektora i kantonalnog inspektora predviđeno je rasponu od 20% do 30% za šta postoji zakonski osnov.

Naime, odredbom člana 23. st.1. Zakona o plaćama i naknadama u organima vlasti Federacije Bosne i Hercegovine ("Službene novine Federacije BiH", broj: 45/10. 111/12 i 20/17) je propisano da dodatak na plaću po osnovu posebnih uvjeta rada iznosi za inspektore, glavne inspektore i direktore inspeksijskih tijela od 20 do 30% od osnovne plaće, što znači da Tuzlanski kanton na zakonit način može utvrditi dodatak na plaću za kantonalne inspektore Kantonalne uprave za inspeksijske poslove Tuzlanskog kantona na istovjetan način kako je navedeno u članu 23. st.1 navedenog zakona. Takođe, analizom relevantnih informacija i materijalnih dokaza može se pouzdano zaključiti da inspektori ove Uprave imaju najmanja

materijalna primanja u odnosu na inspektore u Federaciji, drugim kantonima i općinama.

Kantonalni inspektori Kantonalne uprave za inspekcijske poslove Tuzlanskog kantona rade na području cijelog Tuzlanskog kantona i obavljaju složene poslove kako je opisano u Zakonu i na propisima donijetih na osnovu zakona, te uvijek postoji rizik pri obavljanju službene dužnosti da budu i fizički napadnuti od strane subjekata nadzora, jer poduzimaju upravne i represivne mjere.

U nastavku predočavamo uporedne pokazatelje visine neto plate inspektora ove Uprave i inspektora zaposlenih u drugim organima:

1. Osnovna plata inspektora Kantonalne uprave za inspekcijske poslove Tuzlanskog kantona je **1.247 KM** (290,00x4,3) uvećana za dodatak 20% što **ukupno iznosi 1.496,40 KM.**
2. Osnovna plata inspektora u **Kantonu Sarajevo** je **1.186,80 KM** (276,00 x 4,3) uvećana za dodatak od **30%** što ukupno iznosi **1.542,84 KM**
3. Osnovna plata inspektora u Gradu **Živinice** je **1.354,5 KM** (315.00 x 4.3) uvećana za dodatak od 20% što ukupno iznosi **1625,4 KM**
4. Osnovna plata inspektora u Općini **Lukavac** je **1.386,00 KM** (322,30 x 4,3) uvećana za dodatak od 20% što ukupno iznosi **1.566,00 KM**
5. Osnovna plata inspektora u **Gradu Tuzla** je **1.260,00 KM** (300.00 x 4.2) uvećana za dodatak od 20% **što ukupno iznosi 1.512,00 KM.**
6. Osnovna plata inspektora u **Federalnoj upravi za inspekcijske poslove** je **1.354,50 KM** (315 x 4,3) uvećana za dodatak od **30%** što ukupno iznosi **1.760.85 KM.**

4) U poglavlju V. - Inspekcije i njihov djelokrug u Zakonu o inspekcijama Tuzlanskog kantona, bilo je neophodno precizirati opise poslova Kantonalne urbanističko-građevinske, sanitarne i zdravstvene inspekcije, kako bi isti bili usklađeni sa nadležnostima navedenih inspekcija propisanim u materijalnim propisima, kako je to predloženo u članovima 5.. 6. i 7. Nacrta Zakona.

Takođe. na inicijativu grada Tuzla, članom 8. Nacrta Zakona, dopunjena je odredba člana 63. stav (4) Zakona o inspekcijama Tuzlanskog kantona, kako bi se omogućilo općinskim i gradskim inspekcijama da primjenjuju odredbe članova od 70. do 159. navedenog Zakona i kada vrše inspekcijski nadzor ne samo nad primjenom kantonalnih, nego i propisa drugih nivoa vlasti kojima je određena nadležnost opštinskih i gradskih inspekcija. S obzirom da se ovim otvara pitanje zbog kojeg je potrebno izvršiti šire konsultacije, neophodno je da se o Nacrtu Zakona otvori javna rasprava, u toku koje će se konsultovati Savez općina i gradova Federacije BiH.

5) U poglavlju VII. I Odjelku C) - Postupak inspekcijskog nadzora u Zakonu o inspekcijama Tuzlanskog kantona, predloženo je regulisanje pravnog instituta - izuzeće kantonalnog inspektora u postupanju pri vršenju inspekcijskog nadzora, što je učinjeno dodavanjem članova "95a.", "95b.", "95c. i "95d, iza člana 95.. Naime, odredbe Zakona o upravnom postupku FBiH („Službene novine Federacije Bosne i Hercegovine", broj: 2/98 i 48/99), kao supsidijarnog propisa, zbog specifičnosti postupka inspekcijskog nadzora, ne daju adekvatno i efikasno rješenje u situacijama kada subjekt nadzora traži izuzeće postupajućeg kantonalnog inspektora U praksi se pojavljuju situacije da subjekt nadzora zloupotrebljava ovaj pravni institut u cilju izbjegavanja odgovornosti za učinjeni prekršaj, odugovlačenja inspekcijskog nadzora, prikrivanja i otežavanja utvrđivanja nepravilnosti, na način da kada kantonalni inspektor pristupi inspekcijskom nadzoru, isti tada usmeno zatraži njegovo izuzeće, iz nekog razloga, istovremeno tražeći da kantonalni inspektor odmah prekine sve započete radnje, dok direktor Kantonalne Uprave ne odluči o njegovom usmenom zahtjevu za izuzeće, U takvim situacijama kantonalni inspektor je spriječen da utvrdi nepravilnosti u poslovanju subjekta nadzora. Protekom vremena do momenta odlučivanja o zahtjevu za izuzeću kantonalnog inspektora i nastavka inspekcijskog nadzora, subjekt nadzora ima mogućnost da uredi svoje poslovanje i ispravi nepravilnosti, te izbjegne prekršajnu odgovornost. Posebno je ovo karakteristično kod rada bez odobrenja, nezakonitog radnog angažovanja radnika (rad na crno), neizdavanja fiskalnih računa, nevođenja poslovne dokumentacije (šihtarica, trgovačkih knjiga itd.).

Predložene dopune Zakona o inspekcijama Tuzlanskog kantona, kao lex specialis, onemogućavaju subjekte nadzora da zloupotrebljavaju ovaj pravni institut i na taj način pospješuju efikasnost i učinkovitost rada kantonalnih inspekcija. Takođe. ove dopune obavezuju kantonalne inspektore da u određenim situacijama traže svoje izuzeće, a subjektima nadzora daju mogućnost da i oni iz opravdanih razloga bez zloupotrebe traže izuzeća kantonalnih inspektora.

Takođe, članom 10. Nacrta Zakona, predložena je izmjena člana 106. stav (3) Zakona o inspekcijama Tuzlanskog kantona, kako bi se kantonalnom inspektoru dalo ovlaštenje da i od drugih zaposlenih lica i lica koja su u poslovnom odnosu sa subjektom nadzora (radnici, knjigovođe, kupci, kooperanti, druga pravna i fizička lica i si.), može tražiti materijalne dokaze potrebne za pravilno utvrđivanje činjeničnog stanja i poduzimanje adekvatnih i efikasnih mjera za koje je ovlašten i dužan.

U vezi sa članom 10. Nacrta Zakona je i odredba člana 11. istog, koja stvara obavezu drugih lica i lica koja su u poslovnom odnosu sa subjektom nadzora (radnici, knjigovođe, kupci, kooperanti i druga pravna i fizička lica), da po pismenom pozivu kantonalnog inspektora dostave traženu dokumentaciju koju posjeduju, što

Zakon trenutno ne propisuje.

U članu 12 Nacrta Zakona predloženo je da se u članu 112. stav (2) Zakona o inspekcijama Tuzlanskog kantona, briše riječ „upravne“, budući da je onemogućavala kantonalne inspektore da sankcionišu (poduzmu represivne mjere) druga lica koja ne dopuste kantonalnom inspektorima da kod njih obave potrebne inspekcijske radnje radi pravilnog utvrđivanja činjeničnog stanja kod subjekta nadzora.

11. U Poglavlju XI. - Kaznene odredbe, članom 13. predloženo je propisivanje prekršaja za ponašanje suprotno članu 106. stav (3) Zakona o inspekcijama Tuzlanskog kantona, a u vezi sa kojim su članovi 10. i 11. Nacrta Zakona, te minimalna i maksimalna novčana kazna za svako lice koje kantonalnom inspektorima ne da tražene podatke i druge dokaze za pravilno utvrđivanje činjeničnog stanja

IV - FINANSIJSKA SREDSTVA ZA PROVEDBU ZAKONA

Za provođenje ovog Zakona potrebna su dodatna finansijska sredstva, obzirom da se istim predviđa novo radno mjesto - Glavni kantonalni inspektor za veterinarstvo, kao i povećanje dodatka na plaću direktora, glavnog kantonalnog inspektora i kantonalnog inspektora za 10%. odnosno sa dosadašnjih 20% na 30 %. te je za navedeno potrebno u Budžetu TK planirati i obezbijediti finansijska sredstva u iznosu od cca. **15.502,00KM** u tekućoj budžetskoj 2021. godini, odnosno u iznosu od cca **188.524,00KM** u svakoj narednoj budžetskoj godini.

**OBRADIVAČ
KANTONALNA UPRAVA ZA INSPEKCIJSKE POSLOVE
TUZLANSKOG KANTONA**